



PNTL

REVISTA n.º 1

Polícia Nacional de Timor Leste
Ita nia Polícia

Janeiru
Fevereiro



Editoriál	3
Mensajen Komandante Jerál PNTL	4
Kombate droga no tráfiku ema	6
"Ita proteze fontes informasaun ".....	7
Feto mós bele.....	8
Vizibilidade , I nvolvimentu, P rofisionalizmu.....	10
PNTL estabesele KDD	11
PNTL iha asaun	12
Oin midar polísia ho comunidade.....	14
Hanoin kona-ba administrasaun polísia	16
Kooperasaun PNTL - TLPDP.....	18
Planu estratéjiku PNTL 2014-2018.....	20
Rekola farda militar	20
Retiru PNTL.....	21
Konsolidasaun paz Iha Guiné Bissau	21
PNTL nia belun (PNUD, TLPDP, TLCPP).....	22

REVISTA **PNTL**

Responsavel Jerál

Komandante Jerál PNTL
Komissario Polísia Dr. Longinhos Monteiro

Diretór

Komandante Relasoens Públikas PNTL
Insp. Xefe Honorio Assis Barreto

Hordenadores

Sjt. Julia Moniz
Sjt. Antonio Zacarias
Sjt. Xefe Hermenegilda Abilio

Editór

Noemio Mateus

Grafismu

Nelson Quintão
Insp. Francisco Martins

Fotografia

Ajente Tomas Maia Rodrigues
Bernardino Soares

Sekretariadu

Asst. Insp. Julio Soares Maia
Ajente Xefe Rosinha do Carmo
Ajente Xefe Aliansa dos Santos

Relasaun Públikas e Media PNTL

Rua Jacinto Candido - Caicoli - Dili
No Contacto: **77 312 433**
77 394 446
77 325 881

sumário

nº **1**

editoriál



revista ida ne'e, ita hotu, povu Timor Leste tomak, bele akompaña lala'ok no dezentvolvimentu PNTL nian, iha territóriu laran.

Ami nia esperansa katak revista ne'e bele koresponde duni ita hotu nia espetativa, atu hetan informasaun sira ne'ebé ita hotu hakarak hatene, kona-ba Polísia Nasionál Timor Leste.

Ami sei agradese bo'ot, se hetan ideias, crítica no sujestoens, husi leitores sira hotu, ne'ebé bele tulun ami, atu hadi'a liutan ami nia publikasaun, iha edisaun sira ne'ebé sei tuir mai.

Boa leitura!

Obrigadu barak!

Inspektór Xefe Polísia **Honório A. Barreto**
Xefe Relasaun Públikas PNTL

Foto kapa

PNTL DILI Ajente Xefe Ana Maria de Jesus
husi Tranzitu Nasionál

Martine Perret/UNMIT



Bernardino Soares/PNTL

mensajen

Revista ida ne'e hakarak publika atividade Polísia Nasionál Timor Leste (PNTL) nian ba comunidade, hodi comunidade bele akompaña kna'ar PNTL nian, hodi fó garantia seguransa ba Estadu no comunidade.

Bainhira Nasoens Unidas liu husi UNPol sei sai parseria ba PNTL, ita konsege aproveita meius barak hodi nune'e PNTL bele hala'o hikas kna'ar no dever liu husi tarefas servisu polisiais ne'ebé sai hanesan kna'ar polisia ninian.

Fofoun Nasoens Unidas entrega kna'ar tomak ba PNTL, Timor-oan sira konsege simu kna'ar ne'e no kontinua lori to'o agora, maibé iha fulan ne'en primeiru, ita konfronta ho difikuldade maka remisaun de meius operasionais polisia nian ke difilkuta oituan persentajen atividades operasionais polisia ninian iha terrenu liuliu iha área remotas. I nune'e mós iha parte redusaun lojística ho meius transporte ne'ebé afeta duni ba instituisaun.

Liu tiha fulan ne'en instituisaun komesa konsolida ninia atividades tomak ho meius ne'ebé iha i grasas husi política Governu ninian, ita konsege duni impoen fila-fali nesessidades básicas PNTL ninian para bele hala'o didi'ak fali ninia kna'ar liu husi ninia misaun hamutuk ho ita nia comunidade.

Iha tinan 2013, PNTL lansa ninia moto ida ne'ebé konsentra liu ba iha área polisiamentu komunitária, maka Vizibilidade, Involvimentu, no profesionalizmu (VIP), hamutuk ho atividades polisiamentu komunitária ninian. Signifika PNTL liu husi apoiu parseria oi-oin ne'ebé mak sei iha Timor Leste, hala'o dadauk ona planu ida atu bele impoen ninia prezensa iha misoens ne'ebé liga ho ita nia comunidade.

No iha tinan hanesan, PNTL difini ninia planu estratéjiku ne'ebé sai nu'udar mata dalan ba planu estratéjiku desenvolvimentu atividades instituisaun ninian. Aleinde planu estratéjiku, ita mós iha objetivu estratéjiku nu'udar mata dalan orientadór para bele hamosu atividades iha área importante lima mak hanesan, iha parte lejislasaun, formasaun, administrasaun, disciplina no operasaun. Área sira ne'e konsidera área ne'ebé bo'ot. Aleinde instituisaun desenvolve ninia tarefas no atividades iha área hotu-hotu. Planu estratéjiku ida ne'e mós konjuga ninia atividades hamutuk ho planu estratéjikus ne'ebé mai husi Governu, ne'ebé ita koñese ho Planu 20-30.

Espera katak ho Revista PNTL ne'e, comunidade tomak bele aproveita informasoens ne'ebé bele sai hanesan meius esklaresimentu ida ba se de'it maka ladun kompriende didi'ak desenvolvimentu PNTL nian. Espera mós katak revista ne'e bele uza hanesan meius komunikaun ida husi comunidade ba polisia. I bele mós sai hanesan janela ida para comunidade bele fó kontribuisaun hodi hadia nafatin PNTL iha futuru.

Parabens ba diresaun Relasoens Públikas no hakarek nain ba Revista PNTL nian ne'e, hein katak imi nia kontribuisaun sei habelar informaun di'ak liu no loloos ba comunidade tomak.


Obrigadu

Komisáriu **Longinhos Monteiro**
Komandante Jerál PNTL

Kombate Droga no Tráfiku Ema

“Atividade droga no tráfiku ema uza mós teknolojia ne’ebé avansadu liu ita nia Institusaun nia teknolojia ne’ebé ita uza no laiha mundu ida mesak kombate krimi organizadu mesak maibé presiza kooperasaun ho nasaun sira seluk, mós Institusaun Estadu ne’ebé relevante tenke servisu hamutuk atu bele minimiza”

Komisáriu **Longinhos Monteiro**
Komandante Jerál PNTL



Konsumu droga liu husi inzeasaun

Tomas M. Rodrigues/PNTL

Polísia Nasionál Timor Leste (PNTL) servisu hamutuk ho Embaixada Indonézia realiza Semináriu kona-ba Krime Transnasionál (Droga no Tráfiku ema), durante loron rua iha, 26-27 Novembru 2013, iha Sentru Konvensoens Díli (SKD).

Semináriu ho tema “Kombate Droga no Tráfiku Umanu iha Timor Leste” ne’e, loke husi Vice-Primeiru Ministru, Fernando Lasama no hetan prezensa husi entidades oi-oin iha Timor Leste no husi komitíva ki’ik ida, husi Polísia Repúblika Indonézia (POLRI).

Oradór ba semináriu ne’e mai husi Indonézia, maka, husi Ajênsia Nasionál Narkótika (BNN), Ajênsia Reserse

no Kriminal POLRI no Especialista Kriminolojia Universidade Indonézia. Oradór husi Timor Leste mai husi PNTL, Prokuradoria Jerál Repúblika no Alfândega Timor Leste

Komandante Jerál Polísia Nasionál Timor Leste (PNTL), Longinhos Monteiro, afirma, redi droga no tráfiku ema, sempre uza maneira oi-oin, atu hala’o sira nia atividades, husi nasaun ida ba nasaun seluk. Tanba ne’e, kooperasaun Polísia entre nasaun sira iha mundu, importante atu bele prevene krimi transnasionál

“Ba oin ha’u espera kooperasaun la’o di’ak liu tan, i ha’u fiar katak liu husi semináriu ida ne’e sei iha solusaun

ne’ebé hanesan rekomendasaun ida para kesi-metin servisu entre PNTL ho BNN,” hatete Primanto Hendrasmo, Embaixadór Indonézia iha Timor.

Entretantu, oradór sira iha semináriu ne’e, konkorda katak, atu evita ka hamenus Krimi transnasionál, presiza iha kooperasaun ida di’ak, entre entidades relevantes iha nasaun ida nia laran, no mós, entre polísia nasaun hotu. Kapasitasaun bebeik, ba funsiunárius, membrus seguransa no utilizaun ekipamentus servisu ne’ebé adekuadu, tuir oradór sira, bele kontribui, hodi detekta krime transnasionál.

Média PNTL

Semináriu internasionál Kombate Droga no trafiku ema iha CCD



Bernardino Soares/PNTL



“Ita buka atu kria relasaun di’ak ho parseiru servisu sira seluk i mós ita tenta atu hari’i ita nia redi iha fatin hotu”
Superentidenti Xefe **Henrique da Costa**

Bernardino Soares/PNTL

“Ita Proteze Fontes Informasaun”

Servisu Intelizênsia Polísia, nu’udar departementu ida husi Polísia Nasionál Timor Leste (PNTL), ne’ebé hala’o servisu rekolla informasaun, halo analiza ba informasaun hotu no informa ba Komando Jerál hodi foti desizaun no halo atuasaun.

Diretur Servisu Intelizênsia Polísia (SIP), Superentidenti Xefe Henrique da Costa subliña, SIP iha membru hamutuk 99 (sia nulu resin sia) inklui feto no mane kolokadu iha territóriu Timor Leste.

Enrique rekoñese públiku nia preokupasaun ba kualidade informasaun husi membru Intelizênsia nian, maibé nia husu atu ema hotu nia kooperasaun atu nune’e bele servi povu no nasaun nia di’ak.

“Ba comunidade hot-hotu, hanesan matan no tilun nasaun ninian. Ho membru no facilidade ne’ebé limitadu susar atu kobre territóriu ho di’ak liu. Maibé, ho Timor-oan tomak nia servisu hamutuk bele lori nasaun no povu ida ne’e ba moris di’ak no hakmatek,” hatete Enrique.

Enrique dehan, maske ho difikuldade ne’ebé nia parte hasoru la sai hanesan

dezafiu bo’ot ba sira maibé kontinua hala’o servisu.

“Ami la sente problema sira ne’e sai hanesan impaktu bo’ot ida ba ami hodi kontinua hala’o servisu ho profesionál. Ita tenki aprende liu husi situasaun ne’ebé difisil sai hanesan motivasaun ida hodi hakat nafatin ba oin,” subliña Enrique.

Nu’udar superiór, Enrique dehan, nia parte kontinua buka atu profesionaliza no aumenta nafatin facilidade ba membrus iha servisu intelizênsia nian. Liuliu halo kooperasaun ho ajênsia nasional no internasionál sira.

“Agora dadauk ita iha servisu hamutuk ho parte Alfândega, Z-2 husi FALINTIL-Forsa Defeza Timor Leste (F-FDTL). No buka nafatin atu kria relasaun ho comunidade balun hodi sai hanesan matadalan,” salienta Enrique.

Iha futuro, Enrique dehan, presiza aumenta númeru pesoál intelizênsia nian. Kona-ba formasaun, Enrique hatete, iha rai laran maioria husi membru servisu intelizênsia nian hetan hotu ona iha sentru formasaun polísia nian.

Entertantu iha membru balun hetan ona formasaun iha rai liur mak hanesan Austrália, Indonézia, Filipina no Malaysia.

Tuir Enrique, formasaun ne’ebé mak iha seidauk suficiente, tanba nia dehan, só iha estudu komparativu ruma ba nasaun seluk hodi bele profesionaliza no moderniza liu tan membru sira iha servisu intelizênsia nian.

Enrique mós husu ba comunidade tomak atu koopera di’ak ho servisu intelizênsia nian, fó informasaun no labele tauk hodi taka informasaun tanba servisu intelizênsia nian sei proteje ema ne’ebé fó informasaun no sei tetu informasaun ne’ebé iha.

“Ita proteze fontes informasaun, analiza informasaun, ita hakarak informasaun ne’ebé iha valór,” dehan Enrique.

Enrique mós hatete, durante ne’e nia membru hala’o servisu tuir de’it regras.

“Ema barak kestiona ami nia membru balun ba halo problema no baku comunidade sira. Maibé iha realidade, uainhira ami halo virifikasaun la’os ami nia membru sira,” dehan Enrique.

Média PNTL



Feto Importante Iha PNTL

“Feto iha Polísia Nasionál Timor Leste involve mós iha Unidade hotu. Feto mós bele servisu hanesan ho mane sira. Involvimentu feto sira ne’e hanesan valór ida ba feto maluk hotu iha Timor Leste.”

Superintendenti Asistente Polísia **Umbelina Soares**
Komandante Seksaun Jender PNTL

Tuir lei orgánika PNTL, Komando Jerál ho nia poder tomak hari’i ona Seksaun Jender iha PNTL inklui seksaun seluk ne’ebé Komando presiza. Involvimentu feto iha Seksaun Jender iha instituisaun PNTL atu tau matan liuliu ba feto maluk no labarik minoridade sira ne’ebé hasoru problema iha comunidade sira nia le’et.

Superintendenti Asistente Polísia, Umbelina Soares, subliña, karik iha futuru amandementu ba lei orgánika bele konsidera Seksaun Jender iha PNTL nu’udar Departamentu ida hodi kontinua nia misaun.

Superintendenti Asistente Polísia, Umbelina Soares, subliña, feto sira iha PNTL servisu di’ak tebes no lasura kole maske servisu iha kalan no loron tuir oráriu. I nu’udar inan, feto sira mós fahe tempu ho didi’ak hodi la fó impaktu ba servisu di’ak iha instituisaun nia laran.

Seksaun Jender iha PNTL mós servisu hamutuk ho Sekretária Estadu

Promosaun Inguualidade, Sekretáriu Estadu Seguransa, Ministériu Saúde, Ministériu Solidaridade Sosiál, sosiedade sivil sira inklui ajénsia Gide Line, UN Human. Servisu hamutuk ne’e oinsá mak atu tau matan liu ba dezentvolvimentu no kapasitasaun ba feto iha PNTL no timor-oan tomak.

Importánsia Seksaun Jender iha PNTL bazeia ba Konstituisaun RDTL artigu 17 hatete implementasaun igualidade jéneru iha Timor Leste. Tanba ne’e, iha PNTL, Umbelina subliña, kumpri ona konstituisaun no tau preokupasaun ba feto sira. Hodi nune’e bele tau balansu entre feto ho mane, púrizemplu iha promosaun deviza, dezentvolvimentu feto iha instituisaun no seluk tan.

Difikuldade ne’ebé feto PNTL sira hasoru mak problema família, tanba iha feto balun ne’ebé dala ruma kous, dala ruma servisu kalan, balun nia laen sivil dala ruma mós fó impaktu ba servisu feto sira nian. No aumenta tan ho preokupasaun feto sira tenke kumpri

servisu nu’udar seguransa ba nasaun hatodan tebes feto sira nia kna’ar.

“Ha’u hare feto hotu iha PNTL koñese didi’ak ona difikuldade ne’ebé sira hasoru no hatene sira nia dever serví ba nasaun. Ha’u apresia tebes feto maluk sira,” subliña Superintendenti Asistente Polísia, Umbelina Soares.

Iha oportunidade, Superintendenti Asistente Polísia, Umbelina Soares, hein katak feto Timor sira hakarak tama PNTL hodi aumenta númeru PNTL no serví nasaun iha parte seguransa.

“Ba futuru presiza aumenta tan feto iha PNTL atu nune’e bele asegura prezensa iha comunidade,” dehan Superintendenti Asistente Polísia, Umbelina Soares.

Superintendenti Asistente Polísia, Umbelina Soares, husu atu feto maluk sira liuliu foinsa’e sira presiza prepara an ho saúde di’ak, ba eskola matenek, hatudu performa di’ak tanba seguransa la hare ba feto ka mane.


Média PNTL



Sarjentu Julia Moniz halo ezersisiu iha Sentru Formasaun Polísia

FETO MÓS BELE

Deviza	Feto	Mane	Totál	Feto %
Komisáriu		2	2	
Superintendente Xefe		12	12	
Superintendente	1	18	19	5.26 %
Superintendente Asistente	1	24	25	4.00 %
Inspektur Xefe	3	66	69	4.35 %
Inspektur	13	55	68	19.12 %
Inspektur Asistente	15	133	148	10.14 %
Sarjentu Xefe	32	173	205	15.61 %
Primeiru Sarjentu	9	47	56	16.07 %
Sarjentu	140	584	724	19.34 %
Ajente Xefe	276	1012	1288	21.43 %
Ajente Prinsipál	71	321	392	18.11 %
Ajente	29	310	339	8.55 %
Totál	590	2757	3347	
	17.63 %	82.37 %		



Sarjentu Xefe Aguida Coelho PNTL Tranzitu Nasionál kontrola movimento Rodoviario Dili

VIP

"Polísia la'os atu ba ka'er no baku de'it ema, maibé polísia mós iha misaun ida ne'ebé importante atu aprosima no hakbesik an sai belun di'ak liu ho comunidade sira"
Superintendente Asistente Polísia, **Boavida Ribeiro**
Komandante Unidade Polísia Komunitária

Tomas M. Rodrigues/PNTL

Polísia Komunitária continua hala'o nia misaun, hakbesik'an ba comunidade, atu hetan kooperasaun ne'ebé di'ak liu.

"Ho número PNTL ne'ebé ki'ik, oin sa mak bele produz comunidade sira atu sai mós hanesan matan no tilun," subliña Superintendente Asistente Polísia, Boavida Ribeiro.

Komando Jerál dezeńia ona pilares importante tolu ho natureza Timor Leste nian, ba Polísia Komunitária mak hanesan, Vizibilidade, Involvimentu no Profisionalizmu (VIP). Pilares tolu ne'e mak sai hanesan mata dalan ba Polísia Komunitária atu nafatin sosializa ba comunidade tomak atu kompriende no familiariza ho konseitu ida ne'e.

Objetivu prinsipal VIP nian mak atu muda comunidade sira nia hanoin kona-ba imajen polísia nian ne'ebé ladun di'ak.

Polísia komunitária mós estabesele ona polísia iha Suku ho naran Oficial Polisiamentu Komunitáriu (OPS) ho membru hamutuk 390. OPS hotu, tuir ona formasaun no koloka ona iha Suku 390 husi Suku hamutuk 442 iha territóriu laran. Sira ne'e sei

servisu hamutuk ho comunidade, hodi identifika no resolve problemas iha comunidade nia le'et.

Maske nune'e, tuir Komandante Boavida, nia parte sei hasoru difikuldade oi-oin, tamba OPS sira ne'ebé kolokadu ona iha Suku, sei uza rasik sira nia sasan, hanesan veikulu, gastu ba mina, no telefone hodi hala'o sira nia servisu. No kona-ba hela fatin, maioria OPS laiha hela fatin permanente.

"Ne'e susar tebes. Oinsá mak OPS bele servisu hamutuk ho comunidade sira, enkuantu OPS la hela metin iha Suku sira," lamenta Boavida.

Polísia Komunitária mós, ho tulun husi Fundasaun Ázia, estabesele ona Konsellu Polisiamentu Komunitáriu (KPK) iha Distritu balu.

"Ho atividade estrategia sira ne'e maka muda comunidade nia persepsaun. Purizemplu, iha tinan hirak liu ba, kuandu comunidade balu hetan polísia, dala ruma sira tuda i dalaruma mós, sira tauk. Maibé agora muda oituan ona," konta Boavida.

Média PNTL

VIZIBILIDADE

Prezensa Polísia (komunidade), iha comunidade nia le'et, liu husi atividades hanesan: patrullamentu, edukasaun sívika kona-ba prevensaun kríme, kampaña liu husi média, nsst.

INVOLVIMENTU

Polísia inklui mós lideransa lokal, liu husi konsellu Polisiamentu Komunitáriu, KPK (iha Suku) no Konsellu Polisiamentu Distrital, KDD (iha Distritu), hamutuk, identifika no resolve problemas seguransa iha comunidade nia le'et.

PROFISIONALIZMU

Polísia sei buka servisu no Atende comunidade ho mamar, di'ak, lais no ho responsabilidade.

PNTL estabesele KDD

"Problema seguransa nu'udar fatór ida determinante tebes, atu apóiu prosesu tomak hodi responde ba povu nia moris di'ak. Dala ida tan hatudu ami nia komitmentu atu halo mudansa embairomentu seguransa iha comunidade nia le'et atu comunidade sira bele sente seguru, hakmatek no paz hodi goza duni sira nia liberdade konstitusionál iha ukun rasik an ida ne'e."

Superintendente **Natercia Soares Martins**
Komandante Distritu Liquiça



Komitê Diretiva Distritál (KDD) estabesele husi Polísia Nasionál Timor Leste (PNTL) ho suporta husi programa HAKOHAK ne'ebé implementa husi Fundasaun Ázia ho fundus husi Ajénsia Estados Unidos ba Dezenvolvimentu Internasionál (USAID) no husi Programa Ajuda Nova Zelândia (New Zeland Aid).

KDD hetan kna'ar hodi tau-matan ka orienta implementasaun Koñsellu Polisiamentu Komunitária (KPK) ne'ebé PNTL liu husi Polísia Komunitária hahú estabesele ona iha nivel suku nian, iha Distritu Baucau, Aileu, Manatutu, Bobonaro, Liquiça no Distritu Ainaro ho kolaborasaun husi sidadaun hamutuk liu rihun sanulu (10.000) no husi ofisiais PNTL nian hamutuk atus hitu (700) resin.

Susesu husi konsellu ida ne'e sei depende ba komitmentu no vizaun husi Komandante Distritu sira, ho sira nia kreatividade atu adopta no dezenvolve konseitu Polisiamentu Komunitáriu, tuir nesidade seguransa iha ida-idak nia Distritu.

Komandante Jerál PNTL, Komisáriu Longuinhos Monteiro, afirma, komitmentu PNTL nian, ba polisiamentu komunitáriu nia prinsipiu sira, no espera nia apoiu ba KDD hodi hadia liu tan polísia no comunidade nia relasaun no hametin liu tan seguransa iha Distritu.

Entertantu iha serimónia ofisializadu KDD iha Distritu Liquiça, Xefe Estadu

Maior FALINTIL-Forsa Defeza Timor Leste (F-FDTL), Major Jenerál Lere Anan Timur, kongratula iniciativa PNTL nian hodi hametin seguransa iha Timor Leste.

Xefe Suku sira apresia tebes atensaun bo'ot ne'ebé mak PNTL fó no sira kontenti tanba sira mós bele ko'alia-sai sira nia preokupasaun iha enkontru KDD fulan tolu-tolu, ne'ebé tulun kria akuntabilidade no sai mós oportunidade ba komité no parseiru sira hotu hodi bele diskuti situasaun seguransa iha Distritu laran tomak no preokupasaun seguransa sira seluk no dezenvolve respostas ka medidas kolektivu.

KDD no KPK tulun ona no kontinua tulun ofisiais Polísia Suku sira hodi identifika no trata problema sira ho comunidade sira nia tulun no ko'operaun.

Durante ne'e, kompromisu relaciona ho Polisiamentu Komunitária nian aumenta bo'ot ba bebeik tantu iha nivel operasionál iha Distritu sira no iha nivel polítika.

Média PNTL



Bernardino Soares/PNTL



Bernardino Soares/PNTL

Membro Polísia Marítima hala'o Patrullamentu



Tomas M. Rodrigues/PNTL

Vizita Komandante Jerál ba iha fronteira Oecusse (Leolbatan)



Bernardino Soares/PNTL

Examinasaun husi polísia forensik



Tomas M. Rodrigues/PNTL

Polísia Komunitária fó apoiu ba orfanatu Dare



Bernardino Soares/PNTL

Membro operasaun espesiais
hala'o operasaun Tubulares



Bernardino Soares/PNTL

Treinu tiru emergjensia

PNTL

iha asaun

Oin Midar

Polísia ho Komunidade



Polísia estasaun Comoro halo patrullamentu

Fotos: Tomas M. Rodrigues/PNTL

Instituisaun polísia husi tempu ba tempu buka atu sai belun ne'ebé di'ak liu ho comunidade sira.

Dili Patrol, nu'udar programa ida husi Polísia Nasionál Timor Leste (PNTL) ne'ebé ho objetivu hakbesik an liu ba comunidade sira liu husi halo komunikasaun, kooperaun no aprosimasaun ho comunidade atu prevene konfliktu iha bairo ida-idak.

Programa ida ne'e hetan apoiu mós husi Programa Dezenvolvimentu Polísia Timor Leste (TLDPD) ba Ekipa Patrulla sira servisu hamutuk ho Polísia Eskuadra sira iha sidade Dili. PNTL agora iha veikulu patrulla reserva iha Eskuadra Dili. Ho veikulu reserva halo PNTL bele iha vizibilidade aas iha comunidade nia le'et no mós responde ba krime ho lalais.

Komunidade sira sente orgulhu ho prezensa polísia nian iha sira nia le'et no halo kooperaun di'ak ho sira hodi prevene konfliktu entre

komunidade liuliu joventude sira. Manuel Maria dos Santos nu'udar lia-nain iha Bairo Bebonuk, Suku Comoro, sente kontente tebes ho programa ne'e tanba inportante ba sira prezisa tebes kooperaun entre sira ho polísia hodi nune'e bele evita problemas iha bairo laran.

"Ita prezisa hatudu oin midar ba malu, fó informasaun ba malu liuliu halo amijade ho foinsa'e sira. Buka atu hadi'a hahalok ema ida-idak nian," lia murak husi Komandante Eskuadra Comoro, Felis Tllman, bainhira ho nia membru sira tama sai uma iha bairo sira iha parte Comoro nian.

Ho prezensa polísia ne'e simu ho oin midar tebes husi comunidade sira. Sente kontente ho polísia hakbesik an ba sira no husu atu hasoru malu bebeik ho sira liuliu joven sira.

"Ita hotu hakarak rai ne'e hakmatek atu ita bele hadi'a ita nia moris. Buka halo diálogu, kontaktu ho lider

komunitáriu sira. Ami polísia pruntu fó apoia atu hetan solusaun," subliña liu tan Komandante Eskuadra Felis Tllman.

Iha viajen midar ne'e, hasoru mós Xefe Aldeia Anin Fuik, Suku Comoro, Sub-Distritu Don Aleixo, Distritu Dili, António Soares. Bainhira dada lia, Xefe Aldeia ho sériu oituan haktuir, problema barak akontese duni iha sira nia Aldeia tanba joventude sira hemu tua. Maibe Autoridade lokal ne'e konsidera problema hirak ne'e individuál.

"Sira kuandu lanu dalaruma toka múzika maka'as interrompe ema seluk," hatuir Xefe Aldeia António.

Durante vizita ba comunidade sira, Komandante Eskuadra ho nia membru sira informa mós ba comunidade sira atu kontaktu ba polísia ho número 112 ou bele liu mós husi telefone privadu bainhira mosu problema ruma.

Média PNTL

Ajente polisia hala'o patrulla la'o ain



Polísia halo vizita ba uma Komunidade nia uma



Polísia halo vizita ba eskola



Bernardino Soares/PNTL

Hanoin kona-ba Administrasaun Polísia

Paradigma Interdisipliner, tuir Kelana (2007. 138), hatete disiplina siénsia polísia mak prosesu kontinuasaun husi maneira aprosimasaun ho hanoin interdisipliner atu hetan ligasaun ne'ebé kontinua iha siknifika sientífika bazeia faze tolu mak, Multidisipliner, Cros disipliner no Trans disipliner.

Administrasaun mai husi liafuan latina *Ad no ministrare* ho siknifikadu fornese án ba serbisu no fó apóiu, iha lian engles *Administration* ne'ebé dehan *to Serve* serbisu ho di'ak. Administrasaun nu'udar parte integradu no serbisu hamutuk entre ema 2 ou liu bazeia ba rasionalitas balun hodi alkansa objetivu. Administrasaun nu'udar atividade hotu ne'ebé hala'o liu husi serbisu hamutuk iha organizasaun bazeia ba planu ne'ebé difini hodi hetan objetivu. Administrasaun Polísia, iha perspectiva Jerál, nu'udar atividade ne'ebé parte husi governu, tantu sentru nomos lokal hodi hala'o funsaun polísia. Administrasaun polísia nu'udar segmentu husi pilár estadu ne'ebé atende funsaun ezekeutivu iha departamentu Polísia, nu'udar mós parte hodi hala'o política estadu iha parte PNTL, liuliu política Administrasaun polísia no operasionál.

Iha parte seluk, Bayley (1995) reforsa tan katak, Administrasaun Polísia mak Instituisaun Polísia, ne'ebé harii Instituisaun polísia husi baze ate top no standariza polísia tuir ezizénsia komunidadas nian, nune'e prezisa admistra tuir política no estrategia ne'ebé difini, hodi responde ba amiasas ne'ebé identifika. Kompeténsia ne'ebé admistra Polísia mak Sua Exc Komandante Jerál PNTL no Sua 2 Komandante Jerál da PNTL.

Administrasaun ida seluk fali hare liu ba kestaun téknika, apoia dadus, apoia Lojística, apoia finanseira nomos apoia administrasaun de planeamentu, nemak agora dadaun

Komandante do Komando Administrasaun kaer ba.

Administrasaun tuir Leon Hard Fuld (1909) iha More (1979:13) ko'alia liu kona-ba prinsípiu Administrasaun Polísia, hanesan tuir mai ne'e:

The elimination of politics from Police Administration

1. Especializasaun ba estudu sira
2. Kargu define klaru
3. Supervizaun beibeik husi supervízor
4. Lideransa xefe ezekeutivu forte
5. Audita beibeik husi Inspektor sira
6. Manutensaun disiplina
7. Treinamentu kompreensivu ba Ajente Patrullu sira
8. Selesaun ba pesoál
9. Eliminasun ba kargu la'ós polísia nian.

Hanoin hirak ne'e, halai liu ba kestaun kontrolu no manajementu, katak ita ema prezisa serbisu efetivo no efesiente kuando iha kontrolu, nune'e administrasaun polísia bele fó responde, prezisa lider ne'ebé forti ho mekanizmu kontrolu ne'ebé di'ak, konsisten, holistiko no integradu.

Fatór- fatór administrasaun polísia ne'ebé, prezisa fó atensaun sériu, konpostu :

- a. Serbisu, prezisa iha planeia serbisu ne'ebé klaru tuir objetivu ne'ebé difini iha Grand Strategy.
- b. Rekursus Humanos: Prezisa iha kapasidade especializadas Polísia nomos teknolojia hodi hala'o serbisu ho profesionál

- c. Structur, Serbisu sempre tuir hirarkia, distribuissun kompeténsia, política, prosedura, regulamentu, kódegu étika, SOP, prezisa iha agenda serbisu hodi orienta Distritos, Unidades no Departamentos ba serbisu ne'ebé tenke hala'o tantu Administrasaun no Operasaun.
- d. Kultura, Prezisa iha kultura Polísia ne'ebé style polísia duni hodi kontrola lalaok ou performance elementos iha campo, nu'udar servidor comprometidos.
- e. Inviromento, Prezisa cria inviromento ne'ebé necesario hodi asegura morál no motiva elementos no Komandantes hodi hala'o kna'ar no responsabilidade ne'ebé másimu.

Maluk rona nain sira, dejafiu mai oin sei kompleksu liu tan ba PNTL atu ezerse nia kna'ar nu'udar pilár seguransa Interna, liu-liu infrenta dinámiku sosiál no dinámiku global. Iha Perspetiva ida ne'e, ezizénsia públiku aumenta ás liu tan mai PNTL kona-ba qualidade serbisu, profesionál, proporsionál, neutralidade no patriotizmu.

Liafuan esperansa ne'ebé subliña iha leten, nu'udar mehi hodi asegura objetivu estadu iha prosesu de desenvolvimento nasional. Ita hotu hatene no espera liafuan esperansa mensionadu bele sai realidade duke impresta de'it liafuan hirak ne hodi hetan simpatia política ba objetivu pesoál. Maibé karik ita tenta buka kumpriente ho klean ba liafuan hirak iha leten. Ne hanesan *Hipotetik* ba ema tomak iha Timor Leste hodi buka rasik responde, bazeia liafuan (subyekt and object of security). Iha sintoma ida ne, kada ves elements públiku no elements polítiku sira sempre fó sala ba Instituisaun PNTL no struktura PNTL katak *Seidauk Profesionál*, liafuan ne 'e bele konsidera hanesan sadik duke eziji. Se eziji karik sedu liu tanba sistema PNTL seidauk montadu, maibé sei iha prosesu reformasaun nia laran.

Nune'e atu dehan de'it katak, se ita hotu hakarak polísia ne'ebé profesionál no etos, entaun karik prezisa priense nesidades hirak tuir mai ne'e :

- a. Motivasaun di'ak
- b. Formadu didi'ak
- c. Edukadu didi'ak
- d. Kondisaun profisionál di'ak
- e. Ekipadu didi'ak

Hakarak PNTL fó rezultadu serbisu ne'ebé di'ak no qualidade, prezisa buat hirak hanesan tuir mai ne'e: (Etos/Kinerja)

- a. Apoia Institucional
- b. Apoia Lideransa
- c. Abilidade

Bele dehan ho prosesu reforma, hahú tau dadaun ona kondisaun bázik hodi PNTL hala'o nia kna'ar. Iha prosesu reforma ita mós prezisa hare ho didi'ak, liu-liu ho diagnóstika ida ne'ebé atu reforma polísia tuir lolo'os nia dalan no bele responde ba exijensia povu nian ba iha futuro. Prezisa halo analis ne'ebé perfundu no estudu komparativu ruma hodi hetan amiasas real ne'ebé PNTL sei infrenta no modelo no sistema polísia ida ne'ebé mak bele kooresponde ba karakteristiku povu Timor Leste, no prepara planu estratéjiku (Visaun naruk) ho diagnóstika ne'ebé kooresponde.

Maluk sira,

Ema barak ko'alia reforma, maibé oinsá reforma Polísia iha siosiadade demokrátiku, ne'ebé sei nurak no sei prezisa tempu hodi desenvolve di'ak liu tan maibé prinsipál liu, Timor oan mak tenke kaer xave no kuda talin iha sistema tomak duke ema seluk mak regula ita.

Atu dehan de'it katak liafuan profesionál no etos, bele la'o no metin liu tan iha Instituisaun PNTL, prezisa hare no investe di'ak liu iha área prinsipál tolu (3), hanesan tuir mai :

1. Instrumento Polísia tenke standard
2. Bele hetan Kultura Polísia ne'ebé espera
3. Struktural, Funsionamentu Chain of Command, tantu vertikál no horisontál.

Buat hotu ita bele ko'alia maibé inportante liu mak lideransa ne'ebé iha komitmento no konsistente atu jere no kontrola tuir mekanizmu di'ak (Leadership is the capacity how to translate the vision in to reality).

Iha Grand Design Strategic PNTL 2030 ne'ebé sei mai prezisa hare didi'ak kona ba política no sistema edukasaun PNTL, ne'ebé hahú husi Ajente, Sarjentu, Akademia Polísia, Formasaun especializadas no formasaun karier. Nune'e ikus mai ita bele impresta liafuan: *"The right quantity of men with the right quality on the right place at the right time,"* nune'e hodi bele hala'o sistema manajementu personil compost: manpower planning, recruitment, pre-service education/ training, placement, promotion, in-service education/ training, salary no welfare ate reforma. Nu'udar organizasaun sipil ne'ebé identiko *militarily- organized*. Iha sistema manajementu rekursus humanus PNTL, tuir odamatan 4 (hat) atu entrada ba polísia, hanesan tuir mai:

1. Ajente
2. Sarjentu
3. Akademia Polísia
4. Rekrutamentu ba Ofisiál PNTL ne'ebé mai husi Lisensiatuara.

Ida ne prezisa hare tanba ho mehi ida katak *"the building of modern nation depend upon the development of people and the organization of human activities. Capital, natural resources, foreign trade are of course important, but none is more important than manpower."*

Maluk Sira,

Ita ko'alia dinámika sosiál no dinámika global, siknifika ita ko'alia Konsepsaun no Kondisaun Instituisaun PNTL, karik ida ne'e, prezisa hare geopolitika no geostrategia Timor Leste, nu'udar referénsia hodi ajusta planeamentu 2030 ne'ebé sei mai. Atu hanoin ba fururo desenvolvimento Instituisaun nian, PNTL iha rekursus Humanos ne'ebé naton hodi identifika no difini assuntu ida ne duke asesór mak dulas no ikus mai hamosu konfuzau oi-oin iha PNTL ne'ebé naturalmente, Timor oan mak sei resolve. Ita prezisa duni asesór sira hodi ajuda halo tuir saida mak ita hakarak duke asesór nia hakarak.

Karik ita prezisa konsolida no fó fiar ba produtu lokal ne'ebé formadu maske prezisa apoia morál no apoia política husi parte competente. Fiar án no fiar ita nia produtu rasik, sei sai hanesan forsa estadu ba interesse nasional.

Nune'e reforma PNTL, prezisa identifika problema tuir situasaun real duke *copy paste*, tanba modelo no sistema polísia iha nasaun ida-idak no karakteristiku povu la hanesan. Se ita kopia ema seluk nian, siknifika la tuir ona Timor nia istoria no prinsipiu, katak mate ka moris, ukun rasik án. VIVA PNTL

Mateus Fernandes, MSC. Pol
Supt. Xefe Polísia, 10034

Komandante do Komando da Administrasaun PNTL

Kooperasaun

PNTL - TLPDP

Polísia Federál Austrália (Australia Federal Police / AFP's) liu husi programa Dezenvolvimentu Polísia iha Timor Leste (Timor Leste Police Development Program / TLPDP) remata tiha ona rekonstrusaun ba Sentru Formasaun Polísia Nasionál Timor Leste (SFP-PNTL), Comoro-Díli.

Iha loron 13 Dezembru 2013 offisiálmente halo ona inagurasaun no entrega ba autoridade Sentru Formasaun nian.

Programa ne'e komesa dezenvolve iha inisiu tinan 2009, inklui renovaun edefisius konstrusaun akomodasaun foun hanesan sala ba treinu, kapela, jinájiu, dapur, ha'an fatin, facilidade desportu nian, kampo, lojístika, ho edifísiu sira seluk hanesan sanitasaun, drainajen, hadi'a dalan-jardin nian sira.

Orsamentu ne'ebé gasta ba rekonstrusaun ne'e besik dollar milau ualu. Purtantu, facilidade sira ne'ebé iha agora ho estandarte ida ne'ebé di'ak teb-tebes, ne'ebé realiza tanba servisu di'ak entre PNTL ho TLPDP.

Sentru Formasaun PNTL hetan akreditasaun ho valór 97%. Valór ida a'as tebes, hanesan instituisaun ensinu, iha Timor Leste, husi Korpu Akreditasaun nasional hanesan instituisaun treinu ida ne'ebé ho kualidade a'as.

Sentru Formasaun PNTL oferese kursu oi-oin hanesan lideransa, jestaun no investigasaun to'o nivel diploma. Ida ne'e, inklui 80% husi altu ezekutivu PNTL nian, ne'ebé iha fulan 12 nia laran hetan ona diploma ne'ebé akreditadu iha jestaun polisiál no kuaze 200 investigadores PNTL nian, hetan ona treinamentu kona-ba investigasaun, iha nivel oi-oin. No fó mós formasaun ba kadetes foun naton ba ema 250.

Sentru treinamentu polisia ne'e, oras ne'e funsiona hela ho infraestrutura nivel mundiál ho programas formasaun ne'ebé preparadu atu hetan akreditasaun, hanesan instituisaun ensinu superior iha tinan 2014.



Komandante Jerál PNTL, Dr. Longuinhos Monteiro ho adjunto TLPDP, akompaha ho SES Francisco Guterres. PhD, halo inagurasaun ba fatin Sentru Formasaun PNTL

Média PNTL



Formatura husi Rekrutadu

Modelu PNTL

"Formasaun báziku ba ajente, formasaun báziku ba ofisiais tenke tuir modelu ida de'it. Atu nune'e iha baze servisu hamutuk ho doutrina ida de'it"



"Importante ba ha'u mak antes ita atu hakat ba oin ita tenki hanoin uluk rekursu umanu. Tanba ita agora presiza kualidade rekursu umanu ne'ebé bele lori atu atinji objetivu ne'ebé iha," dehan Hornai.

"Se ita sosa kareta ida, ita tenki prepara uluk kondutor ida. Se lae kareta ne'e bele laiha funsaun. Tanba ne'e, importante liu mak ita tenki prepara uluk rekursu umanu molok hari'i Akademia Polísia ida, ne'ebé bele hetan kualidade a'as, iha nasaun ne'e," hatutan Hornai.

SENTRU FORMASAUN PNTL

Misaun no Kompeténsia sira

1. Sentru Formasaun Polísia nian maka eskola PNTL nian ne'ebé iha kapasidade espesial hodi fó formasaun moral, kultural, fizika no tékniku-profisionál ba ofisiál, sarjentu no ajente sira, no mós hodi atualiza, especializa no valorizasa nia koñesimentu.
2. Liu husi despaxu, Komandante Jerál nomeia Superintendente Xefe ida hodi Komanda Sentru formasaun Polísia nian.
3. Sentru Formasaun Polísia nian maka responsavel hodi halo konsepsaun sistema hanorin ba

Superintendente Xefe **Julio Hornai**
Komandante Sentru Formasaun PNTL

PNTL, ne'ebé inklui kursu formasaun, kursu espesializasaun, kursu atualizasaun no kursu promosaun ba kategoria no postu sira.

4. Sentru formasaun Polísia nian maka responsavel hodi organiza no hala'o kursu hirak ne'ebé refere iha leten no dezenvolve kurrikulu no programa ba ida- idak.

5. Sentru Formasaun Polísia nian maka iha kompeténsia atu halo proposta ba no prepara planu anual asaun ba formasaun, ho hanoin ba objektivu no nesiedade jerál no espesifiku unidade sira PNTL nian.

6. Sentru formasaun Polísia nian sei koordena ho Ministériu Justisa hodi halo programa Kursu Investigasaun Kriminal nian.

7. Sentru Formasaun Polísia nian tuir regulamentu rasik, ne'ebé sei aprova iha Konsellu Ministru, ne'ebé difini estrutura formadór sira nian, perfil planu kurrikulu nian, sertifikasaun formasaun, avaliasaun no validasaun treinu nian no mós koordenasaun ho Ministériu Edukasaun no Ministériu Administrasaun Estatál, kona-ba asuntu ne'ebé refere ba kontiudu kursu sira ne'ebé bele iha koñesimentu sivil.

Média PNTL



Membru operasaun espesiais hala'o treinu tiru reasaun

Planu Estratéjiku PNTL 2014-2018

“Planu Estratéjiku la’os de’it hatuur-hakerek ami nia vizaun, misaun no prioridade sira, maibé nia sai fundasaun ba dalan oinsá atu dezenvolve seguransa públika iha Timor Leste.”

Komisáriu **Longinhos Monteiro**
Komandante Jerál PNTL



Polisia Nasionál Timor Leste (PNTL), iha loron Segunda, 10 Fevereiro 2014, lansa nia livru Planu Estratéjiku ba Tinan 2015-2018. Iha serimónia ne’ebé hala’o iha Kuartel Jerál PNTL ne’e, lansa mós dokumentu importante tolu seluk, hanesan, Planu Atividade Anual ba Tinan 2014, Evaluasaun desempeñu ba membru PNTL tomak, no Deskrisaun servisu ba Komandu Distrital.

Planu Estratéjiku hanesan estabelese direasaun ba PNTL, atu realiza objetivu sentrá rua mak hanesan, mandatu Governu Timor Leste nian, atu reforma no dezenvolve PNTL (hare tabela) no konsolida orden públika no seguransa comunidade nian.

Iha nia intervensaun iha serimónia lansamentu ne’e, Komandante Jerál PNTL, Komisáriu, Longinhos, hatete, Planu Estratéjiku ida ne’e, hanesan matadalan ba atividades PNTL nian hotu i refleta ba planus, programas, no dezenvolvimentu instituisaun PNTL nian, tui orientasaun husi Governu. Maibé Komandante Longinhos mós subliña katak, buat hotu, sei la bazeia de’it ba Planu estratéjiku ida ne’e.

Entretantu, Xefe Departamentu Administrasaun no Planeamentu PNTL, Superintendenti Xefe, João Belo, informa katak, sei iha mós equipa ida husi Komandu Jerál, ne’ebé sei tu’un ba komandu Distrital, hodi tulun Komandante sira, hodi halo sosializasaun kona-ba Planu Estratéjiku PNTL nian ne’e, ba comunidade sira.

Marka prezensa iha serimónia lansamentu ne’e, Diretór Jerál Sekretariadu Estadu Seguransa, Ofisias superiores PNTL, Komandante Distritus, parseirus PNTL nian sira, no representante Sosiedade Sivil balu.

Média PNTL

Rekolla Farda Militar

Tuir lei, só FALINTIL-Forsa Defeza Timor Leste (F-FDTL) no Polisia Nasionál Timor Leste (PNTL) mak uza atributu no farda Militar

Relasiona ho lei ne’ebé iha, Polisia Nasionál Timor Leste (PNTL) halo ejekusaun hodi rekolla atributu no farda militar husi ema sivil sira ne’ebé organizadu iha território hodi hamosu konfusaun iha comunidade nia le’et.

Kna’ar PNTL nian mak mantein estabilidade seguransa iha comunidade nia le’et, hodi nune’e comunidade sira bele hala’o sira nia atividade ho hakmatek.

PNTL, liu husi Unidade Polisia Komunitáriu, kontinua hala’o kooperasaun ho comunidade sira no fó nafatin kampaña atu comunidade sira labele monu ba lasu grupu ka individu ida hodi halo violénsia no krime iha bairo sira.

Iha loron 04 Dezembru 2013, Komando PNTL Distritu Baucau servisu hamutuk ho FALINTIL-Forsa Defeza Timor Leste (F-FDTL), koopera ho Administradór Distritu Baucau no autoridade lokal sira, hahú rekolla ona atributu no farda militar husi grupu ne’ebé organiza husi Komandante Labarik, hodi konsentra iha fatin tolu iha Baucau mak hanesan Trilolo, Baucau Villa, Buruma no Bualale. No tui planu, operasaun sei kontinua iha território hodi asegura estabilidade seguransa iha rai laran.

Média PNTL



Fotos: Tomas M. Rodrigues/PNTL

Retiru PNTL

“Hakoi egoizmu hodi hafoun espíritu nasionalizmu, iha dezenvolvimentu PNTL”



Komandante Jerál PNTL tara tais ba Bispo Diocese Maliana Dom Norberto do Amaral

Durante loron tolu, 06-08 Dezembru 2013, iha Sentru Treinamentu Báziku-Rairobo, Polisia Nasionál Timor Leste (PNTL) halo retiru hamutuk ho tema *“Hakoi egoizmu hodi hafoun íspiritu nasionalizmu, iha dezenvolvimentu PNTL.”* Retiru ne’e organiza husi Amu Kapelaun PNTL, Pe. Nelinho Soares, O. Carm. No partisipa husi komandante superior komando jerál no komando Distritais, Unidades no Eskuadra.

Iha retiru ne’e, aleinde hala’o reflesaun, halo mós konferénsia no atividades seluk, hanesan kuda ai-oan no jogo futebol entre membrus PNTL husi Kuartel Jerál, hasoru sira, mai husi Distritu.

Iha konferénsia ne’ebé hala’o loron tolu tui-tui malu, sai hanesan oradóres maka, Pe. Krisna, CMF, Pe. Emanuel Talok, CMF, Anton Bere, no taka husi Amu Bispu Diocese Maliana, Don Norberto do Amaral.

Koalia ho tema *“Muda o nia fuan, muda mundu,”* Don Norberto, afirma, ho regras mak bele harmoniza funsaun hotu iha instituisaun no Kumpri regras, mak bele servi ema hotu. Don Norberto hatutan, ema ida-idak tenki luta kontra nia an ba hahalok egoizmu no hahalok a’at sira.

Komandante Jerál PNTL, Komisáriu, Longinhos Monteiro, iha nia intervensaun, espera, ho retiru durante loron tolu ne’e, bele loke pájina foun ba membru ida-idak ho objetivu prinsipal, buka atu hafoun íspiritu nasionalizmu. Hodi bele kontribui ba dezenvolvimentu instituisaun no servi ba nasaun no povu nia di’ak.

Retiru PNTL nian ne’e, taka ho misa hamutuk, ho comunidade Rairobo, ne’ebé hetan surpresa husi Komandante Longinhos, ne’ebé hodi PNTL nia naran, oferece apoiu atu hadi’a sira nia Kapela.

Média PNTL

Konsolidasaun Paz Iha Guiné Bissau



Angelo Quelo
Inspektor Xefe



Teresinha de Sousa
Sarjentu Xefe



Rui Fátima Martins
Sarjentu

Maske Polisia Nasionál Timor Leste (PNTL), sei ho idade ida ne’ebé nurak, PNTL hetan dadauk ona rekoñesimentu ba nia servisu sira. I fiar ida ne’ebé bo’ot ba PNTL, mak mai husi Organizasaun Nasoens Unidas (ONU), ne’ebé inklui mós membrus sira PNTL nian, iha ONU nia misaun, iha rai seluk.

Iha Guiné Bissau, púrizemplu, nasaun ne’ebé óras ne’e ONU hala’o nia misaun, PNTL iha membrus nain tolu mak integra iha Misaun Konsolidasaun ba Paz, iha nasaun afrikana ne’e. Inspektor Xefe, Angelo Kelo, Sarjentu Xefe, Teresinha de Sousa i Sarjentu, Rui Fátima Martins, mak PNTL nia representante iha Misaun ONU nian ne’e.

Iha Guiné, membrus Polisia Nasionál Timor Leste nian ne’e kolokadu iha fatin oi-oin, hodi besik liu ba populasoens, ne’ebé prezisa sira nia tulun. Iha sira nia misaun ne’e, Polisia Timor-oan sira mós, iha responsabilidade atu hatudu prinsipiu Polisiamentu Komunitáriu, ne’ebé aplika ona iha Timor Leste, ba povu Guiné Bissau. Iha Sub-setores Catio, provínsia Tombali, parte sul Guiné Bissau nian, membrus PNTL nian sira ne’e, halo vizita ba populasoens sira nia uma, hatudu lala’ok Polisia Komunitaria nian, ne’ebé buka hakbesik an ba povu, atu hamutuk, prevene krimi no hametin seguransa iha comunidade nia le’et.

Aleinde ne’e, hanesan mós membru Polisia ONU nian, sira mós ativu hala’o vizita traballu ba fatin-fatin, hodi hatene polisia Guiné nia kondisoens servisu no tulun mós polisia Guiné hodi hala’o sira nia responsabilidade iha área oi-oin polisia nian.

Média PNTL



PNTL NIA BELUN

Fornese **Formasaun** ho **Kualidade**

Dezañu bo'ot ida-ne'ebé PNTL hasoru mak oinsá atu fornese formasaun di'akliu no sustentavel ba ofisiál PNTL iha Distritu sira. Atu responde ba dezañu ida-ne'e, PNTL ho apoiu husi Polisia Federál Austrália nian liu husi sira-nia Programa Dezenvolvimentu Polisia Timor Leste (TLPDP), organiza membru rua husi Distritu ida-ida atu hala'o Sertifikadu IV kona-ba Treinamentu no Avaliasaun, fornese liu husi Organizaasaun formasaun esternu ida, Sentru Treinamentu Juventude Comoro (STVJ) iha Díli.

"Ami hanoin tebes katak treinamentu ne'e sei hadi'ak maka'as padraun sira iha Distritu," hatete Adjuntu Inspektor Afonso da Silva Soares. *"Importante katak ofisiál PNTL sira bele fornese treinamentu ne'ebé iha kontinuasaun hanesan*

ne'ebé presiza atu mantein forza polisia profesionál, no la presiza depende ba assisténsia esterna."

Objetivu prinsipál projetu ne'e nian mak atu iha treinadór PNTL kualifikadu fornese treinamentu bazeia iha Distritu iha kooperasaun ho Sentru Formasaun Polisia. Atu komplementa programa ida-ne'e, treinadór Distritu ne'ebé foin atu hetan kualifikasaun simu treinamentu tan iha Sentru Formasaun Polisia iha matéria hanesan jestaun fatin krime, investigasaun, IT no prosedimentu administrasaun atu fornese ne'ebé sira rekere atu halo

planeamentu no implementa treinamentu no koloka sira, iha sira-nia Distritu.

Média PNTL

Projetu **PNUD** apoiu PNTL

Husi Marsu 2011, Polisia Nasionál Timor Leste (PNTL) kaer responsabilidade ba ezekeusaun lei no seguransa públika iha rai-laran tomak – ba dahuluk husi sira-nia formasaun iha 2002. Mezmuké forza polisia nasional hatudu progresu bo'ot husi tempu ne'ebá, Altu Komandu PNTL nian identifika área xave sira ne'ebé presiza reforsa, inklui área komunikasaun, teknolojia informasaun, rekursu umanu, jestaun bens no manutensaun veikulu nian.

Iha 2013 Programa Nasoens Unidas ba Dezenvolvimentu no PNTL hahú projetu kapasitasaun tinan-rua iha área prioridade hirak ne'e dezañadu atu tulun PNTL implementa direktamente no monitoriza sira-nia Planu Asaun Estratéjiku ba tinan-lima (2014-2018). Projetu ne'e koloka peritu na'in-lima no ema sivil nasional balu atu serbisu iha laran unidade

relasaun públikas, rekursu umanu, IT no lojística PNTL nian. Asesor tékniku superiór ida mós fó apoiu ba Altu Komandu PNTL nian.

Husi fulan Setembru 2013, iha ona progresu metin. Peritu na'in-tolu husi lima serbisu hamutuk ona ho ema sivil nasional na'in-hitu iha unidade relasaun públikas, IT no rekursu umanu sira. La kleur tan peritu rua tan sei hahú sira-nia serbisu.

Projetu ne'e mak harii husi serbisu Misaun Integradu Nasoens Unidas nian iha Timor Leste (UNMIT) no sei buka atu hadi'ak governasaun liu husi haforte ofisiál PNTL sira iha Kuartél-Jerál nia kapasidade jestaun no administrativu.

Média PNTL

Programa Dezenvolvimentu Polisia Timor Leste (TLPDP) fó apoiu ba PNTL husi 2004 iha área investigasaun, formasaun no governasaun. Serbisu kapasitasaun ne'ebé hala'o ona liuhosi TLPDP ne'e hatudu Governu Austrália nia apoiu kontinuozu ba PNTL nia dezenvolvimentu, liuliu liuhosi dezenvolvimentu infraestrutura iha Sentru Formasaun Polisia, akreditasaun nasional ba PNTL nia instituisaun formasaun, akreditasaun nasional ba formasaun investigasaun no jestaun ezekeutivu no fornecimentu apoiu ba kapasitasaun polisiamentu operasionál iha área alvu sira.



Inspektor Francisco Martins fo apoiu ba comunidade

Autokarru Polisia hakbesik ba Komunitade BETO

Komunitade Beto iha parte oueste iha Distritu Díli mak área ida-ne'ebé iha frekuénsia krime aasliu iha Díli. Iniciativa PNTL foun ida, ne'ebé uza autokarru iha intensaan atu lori servisu polisiamentu besik liu povu sira. Autokarru ne'e sei sai eskuadra polisia komunitária movel ulukliu iha rai-laran. Se karik hetan susesu, iha aspirasaun katak bele utiliza tan iha fatin seluk iha Distritu Díli.

Autokarru ne'e, koñesidu hanesan Sentru Polisiamentu Komunitária Movel, agora daudaun sei hadi'a hela. Iha nia laran, sei iha seksaun privadu ba polisia sira atu diskute asuntu reportajen sensível ho sidadaun sira. Sei iha mós área ida ho kapasidade atu hala'o reuniaun ho ema na'in-sanulu no armáriu sira nakonu ho informasaun kona-ba direitu vítima, prevensaun krime, konxensializasaun alkohol no droga, informasaun ba joventude, no seguransa pesoál no komunitária nian. Nia li'ur sei pinta atu identifika karreta ne'e hanesan PNTL nian nomós hanesan sentru polisiamentu komunitária.

"Sentru polisiamentu movel, ka autokarru ne'e, sei halo PNTL sai vizivel liu iha comunidade nia le'et, fó dalan ba povu sira atu hetan asesu di'akliu ba polisia no jeralmente aumenta konfidénsia no fiar ne'ebé povu sira fó ba PNTL," hatete Adjuntu Inspektor Tomas Soares ne'ebé kaer projetu autokarru ne'e.

"Ami fiar katak konfidénsia no fiar liután ne'e sei tulun atu

hadi'ak informasaun husi comunidade sira ba polisia kona-ba krime. No ida-ne'e sei fó tulun direktamente ba polisia sira atu serbisu ho membru comunidade atu hamenus no prevene krime, ne'ebé hanesan prinsipiu sentrá ba polisiamentu komunitária," hatutan Adjuntu Inspektor Soares.

Autokarru ne'e sei iha kapasidade atu vizita no para iha eventu komunitário, área ne'ebé identifika hanesan área problemátika ka fatin krime nian, vizita eskola no fatin seluk

bainhira iha oportunidade atu prevene no hamenus insidénsia krime no trauma estrada nian nomós hamenus comunidade nia ta'uk kona-ba krime no trauma estrada nian. Ajente polisiamentu komunitária sira sei hala'o autokarru nia operaasaun no sei enkaisa'an an ho comunidade sira iha Beto atu fornese ambiente seguru liu ba membru comunidade sira-hotu.

Autokarru ne'e submete ba Superintendente Xefe Pedro Belo, Komandante Distritu Díli, ne'ebé iha fulan-Novembru tinan foin liubá anúnsia katak Beto mak

atu simu sentru polisiamentu komunitária. Autokarru ne'e hetan apoiu husi Departamentu Polisiamentu Komunitária Nasionál, Hakohak, JICA no Programa Polisiamentu Komunitária Timor Leste (TLCPP) ne'ebé fó konsellu no apoiu tuir neseseidade. Autokarru ne'e sei lansa formalmente no sai operasionál durante fulan Fevereiro-Marsu.

Média PNTL



Fotos: Tomas M. Rodrigues/PNTL



Tomas M. Rodrigues/PNTL

Apoiu husi



*Empowered lives.
Resilient nations.*



**From
the People of Japan**